

明

史

稿

明

史

稿

明史藁

列傳第一百四十八

光祿大夫經筵講官明史總裁戶部尚書加七級臣王鳴緒奏

編撰

馬世奇

吳麟徵

周鳳翔

劉理順

汪偉

吳甘來

王章

陳良謨

陳純德

申佳胤

成德

許直

金鉉

馬世奇字君常無錫人祖濂進士桂林知府世奇幼穎異嗜學有文名舉崇禎四年進士改庶吉士授編修座主周延儒世奇同郡也當國世奇務引大義非公事不以告十二年帝

以頻歲用兵海內勞苦遣詞臣分諭諸藩世奇使山東湖廣
江西諸王府所至却餽遺還進左諭德父憂歸服除會延儒
再相世奇遠權勢不入都及還朝進左庶子則延儒已賜死
親暱者率避去世奇力經紀其喪時寇警日聞帝數召廷臣
問計世奇言弭亂以人心爲本闖獻二賊除獻易除闖難獻
專刑戮人所畏闖佯不殺人所附也今欲收人心在勅督撫
鎮將嚴束伍部令兵不虐民人心親附賊勢乃孤帝稱善爲
下詔申飭已賊薄都城諸大臣無能畫一策世奇太息泣下
曰事已不可爲吾死而已城陷世奇方早食投筯起問帝安
在或言已出城明日知帝崩東宮二王被執曰吾得死所矣
其僕曰如太夫人何世奇曰正恐辱太夫人耳作書別母

衣冠捧所署司經局印望闕拜曰臣不能報國一死謝陛
將自經二妾朱李盛飾前世奇訝曰若以我死將辭我耶
曰主人盡節我二人拜辭從死耳世奇曰有是哉二妾拜訖
竝先縊死世奇乃自縊福王時贈禮部右侍郎諡文忠

本朝賜諡文肅世奇砥礪名行居館閣最有聲好推引後進
不妄取與居父憂時蘇州推官倪長圩其門人也以贖鍰三
千金助喪辭曰蘇大饑留此賑民可也長圩以三百金犒從
者立送所司爲鄉邑修學費其疎財樂義如此

吳麟徵字聖生海鹽人天啓二年進士除建昌府推官捕劇
盜擒豪猾治聲日聞父憂歸補興化府廉公有威僚屬莫敢
以私進崇禎五年擢吏科給事中首疏請達下情悉民隱言

甚切至又請精擇郡守言郡守廉縣令不敢貪郡守慈縣令不敢虐郡守精明縣令不敢叢脞宜倣宣宗用況鍾等故事精擇禮遣重以璽書假便宜責令久任民生疾苦吏治臧否使得自達天子時不能行河決蘇家嘴新溝口南下不復東歸海淮揚諸屬邑悉被災督漕侍郎李待問不能治麟徵極論其罪吏部郎中牟道行左遷廣西太平知府麟徵言道行貪污并不當守郡建安知縣徐汝驊用賄首薦牘麟徵發其奸并劾湖廣巡按白士麟廣建生祠立碑搆謠頌偽吏亂直諸人多獲譴同官章正宸以劾王應熊下詔獄麟徵論救漏刻博士周長庚疏諂中官且請搜括麟徵力駁其謬尋上疏乞假葬父自引六罪詞甚哀切既去貽言路公揭略言自言

官積輕廟堂之上往往反其言而用之奸人窺見此旨明告
君父目爲朋黨自稱孤立下背公論上竊主權諸君子宜盡
化沾沾之意毋落其彀中使清流之禍再見明時激成之患
貽悔後日居久之還朝劾吏部尚書田唯嘉贓污唯嘉罷去
再遷刑科左給事中故相文震孟卒所司不敢聞麟徵爲請
恤丁繼母憂服闋起吏科都給事中吏部用人多徇請託麟
徵言限年固銓衡敝然舍此無以待中才今遷轉如流不按
資俸品級徒開奔競門帝深然之請勅南京兵部尚書史可
法節制江南諸帥控禦流賊姜採熊開元以劾周延儒下詔
獄麟徵論救帝不聽李自成大熾而山海關外八城又強半
失守十七年二月薊遼總督王永吉聞自成入秦知其必渡

河奏請撤寧遠吳三桂兵守關內大學士陳演不敢決請下撫鎮酌行之既而警報日至羣臣皆言非薊督永吉寧鎮三桂密鎮唐通合力一戰不可帝然之令本兵具奏演言錦州告警寧遠兵必不可調帝召羣臣會議不決獨成國公朱純臣戶部尚書倪元璐刑部侍郎金之俊都給事中孫承澤以爲當調而麟徵爭尤力且言三桂勇將宜拔用無委之敵人今賊旦夕發秦晉若使來扞京師一舉兩得今日之事當揆緩急無論是非也退復具疏力言之演復請下永吉等議永吉等皆以撤關外兵入援爲便帝俞之永吉聞命三月初出關與三桂徙寧遠衆五十萬日行數十里十六日入關二十日抵豐潤而京師已陷矣故事吏垣長無出外者帝欲令給

事御史內外兼用以習民事會吏部推麟徵京卿旨言未歷
監司不得內擢麟徵乃移牒吏部求外補吏部以麟徵望重
再推太常少卿帝亦報允未幾賊薄京師麟徵守西直門賊
詐爲勤王兵請入中官欲納之麟徵不可以土石堅塞其門
募死士縋城襲擊多所斬獲乘間入朝欲見帝白事至午門
遇大學士魏藻德引麟徵手曰國家如天之福必無他虞旦
夕兵餉集公何匆遽爲引之出乃復登陴明日城陷麟徵欲
還邸已爲賊所據乃入道旁祠作書決家人曰祖宗二百七
十餘年宗社一旦至此雖上有亢龍之悔下有魚爛之殃而
身居諫垣無所匡救法當褫服殛用角巾青衫覆以單衾足
矣解帶自經家人救之甦環泣請曰待視孝廉至一決可乎

許之祝孝廉名淵以救劉宗周下獄與麟徵善者也時給事中高翔漢漢中人受賊顯職來說麟徵降麟徵怒叱之去明日淵至麟徵慷慨曰憶登第時夢隱士劉宗周吟文信國零丁洋詩今山河碎矣不死何爲酌酒與淵別自經死淵爲視舍殮乃去福王時贈兵部右侍郎謚忠節

本朝賜謚貞肅

周鳳翔字儀伯浙江山陰人崇禎元年進士改庶吉士授編修遷南京國子司業靈璧侯奴辱諸生鳳翔執付法司祭酒許士柔爲檢討時嘗撰都御史高攀龍誥文閱十年未給及張至發當國銜士柔以新令誥詞不得用駢語劾士柔違令貶其官鳳翔不平抗疏言故事詞臣撰文不當閣臣裁之否

則令改撰未有徑彈劾者詔敕用寶歲有常期未有十年後
用寶進呈吹求當制者贈詔專屬中書崇禎三年所申飭未
有追咎元年史官詆爲越俎者攀龍純忠直節爲陛下所褒
一旦毛舉細故舞文反汗俾忠良色沮非所以勵當今示後
世疏雖不行士論趨之歷中允諭德爲東宮講官嘗召對平
臺問滅寇策言論慷慨帝爲悚聽軍需急議稅間架錢鳳翔
曰事至此急宜收人心尚可括民財搖國勢耶昔賢謂民心
一失不可復收國勢一傾不可復振正謂是也尚書倪元璐
亟稱其言匹何京師陷莊烈帝殉社稷有謠傳駕南幸者鳳
翔不知帝所在趨入朝見魏藻德陳演侯恂宋企郊等羣入
而賊李自成據御坐受朝賀鳳翔至殿前大哭急從左掖門

趨出賊亦不問歸至邸作書辭二親題詩壁間自經死其詩有碧血九原依聖主白頭二老哭忠魂天下誦而悲之去帝崩纔兩日也福王時贈禮部右侍郎諡文節

本朝賜諡文忠

劉理順字復禮杞縣人萬曆中舉於鄉十赴會試至崇禎七年始中式及廷對帝親擢第一還宮喜曰朕今日得一耆碩矣理順素有學行朝士咸稱帝知人理順益感激其鄉人爭羨之理順曰昔王曾志不在溫飽吾豈異是且憂懼方始何羨爲拜修撰益勤學朝退輒鍵戶讀書非其人不與交十二年春畿輔告警疏陳作士氣矜窮民簡良吏定師期信賞罰詔脅從六事下所司議行因蠲畿輔山東被兵逋賦歷南京

葉左中允左諭德入侍經筵兼東宮講官楊嗣昌奪情入
閣理順昌言於朝嗣昌怒奪其講官開封垂陷理順大慟曰
中原破則京師危矣建議河北設重臣練敢死士爲後圖疏
格不行楊嗣昌薛國觀周延儒迭用事理順一無所附麗出
溫體仁門言論無少徇十七年三月賊犯京師急理順詣朝
房謂諸執政曰守卒缺餉陰雨饑凍急宜請內帑鼓勇士背
城一戰或堅守以待勤王師不然大事去矣衆唯唯理順太
息歸悉捐家貲分犒守城卒僚友或問進止正色曰存亡視
國尚須商酌耶城破妻萬妾李請先死理順許之俟其既絕
具袍笏北向再拜入別宗祠大書曰成仁取義孔孟所傳文
信踐之吾何不然旣占科名豈敢苟全三忠祠內無愧前賢

書畢投繯死年六十三僕四人皆從死羣盜多中州人聞其死入唁曰此吾鄉杞縣劉狀元也居鄉厚德何遽死羅拜號泣而去後贈詹事諡文正

本朝賜諡文烈

汪偉字叔度休寧人崇禎元年進士除慈谿知縣政績大著十一年帝念寇氛日熾擇知推治行卓絕者入翰林以備大用偉擢檢討尋以治祖母葬歸還朝充東宮講官十六年賊陷承天荆襄偉以留都根本可慮上江防綢繆疏言金陵城週百二十里雖十萬衆不能守故議者謂無守城法止有防江法賊自北來則淮安爲要自上而下則九江爲要禦淮卽所以禦江守九江卽所以守金陵也淮有史可法屹然保障

矣九江一郡宜設立重臣以鎮之上而武昌下而太平采石
浦口各命南京兵部大臣建牙分闔則聲援接而金陵之門
戶固矣南京兵部與操江事不相涉操江欲用兵而無人兵
部有重兵而無用宜令緩急相應而府尹府丞之官亟重其
權久其任聯百萬士民心以分兵部操江之責因言清議所
歸如御史詹兆恒葉樹聲楊四重故御史郭維經成勇故巡
撫袁繼咸方孔炤等宜以備督撫京兆之選帝嘉納之九江
乃特設總督又言兵額旣虧宜以衛所官舍餘丁補伍操練
修治兵船以資防禦如額餉不足則暫借鹽課漕米以給之
前後所條奏皆切時務明年三月賊兵東犯偉語閣臣事急
矣亟遣大僚分守畿郡一切便宜從事都中城守則文自內

閣武自公侯伯以下各率子弟畫地分守庶民統以紳士家
自爲守而京軍分番巡徼以待勤王之師魏藻德曰大僚守
畿輔誰肯者偉曰此何等時猶較尊卑計安危耶請以一劇
郡見委藻德哂其早計未幾真定游擊謝嘉福殺巡撫徐標
迎賊偉泣曰事至此乎作書寄友人曰賊據真定奸人滿都
城外郡上供絲粟不至諸臣無一可支危亾者如聖主何平
時誤國之人終日言門戶而不顧朝廷今當何處仲狂喙耶
賊薄都城守兵乏餉不得食偉出賁市餅餌以饋已而城陷
偉歸寓語繼室耿善撫幼子耿泣曰我獨不能從公死乎因
以幼子屬其弟衣新衣上下縫引刀自剄不殊復投繯遂絕
時年二十三偉欣然曰是成吾志移其屍於堂援筆書壁曰

翰林院檢討東宮日講官汪偉同繼室耿氏死節貽子觀書
勉以忠孝乃自經福王時贈少詹事諡文烈

本朝賜諡文毅

吳甘來字和受江西新昌人父之才西安府同知甘來與兄
泰來同舉鄉試崇禎改元甘來成進士授中書舍人後三年
泰來亦成進士授南京太常博士五年甘來擢刑科給事中
伉直敢言戶部尚書畢自嚴下獄抗疏救之帝重法繩下朝
士坐大辟者累累甘來疏請停刑蕪湖設關商舟多覆沒甘
來請罷征七年西北大旱疏言秦晉間人相食父子兄弟不
相顧陛下發粟以賑猶恐被澤者少乃山西難民半爲總兵
官張應昌等殺以冒功中州諸郡畏曹變蛟兵甚於賊臣實